

Maio 2018.



A científica atópase facendo unha estada de investigación en Noruega.

A BIÓLOGA MARÍA FERNÁNDEZ, UNHA DAS MELLORES DIVULGADORAS DO CERTAME SOMOS CIENTÍFICOS.

M. Del Río | Vigo

Comunicar ciencia, divulgar coñecemento e poñer en valor o papel da investigación no desenvolvemento social e humano. Para visibilizar estes aspectos, o certame de divulgación Somos Científicos uniu entre o 16 e o 27 de abril 30 expertos e expertas de todo o Estado con estudantes de 85 centros de ensino de España e de países suramericanos. Organizado pola organizado por Fecyt e La Caixa, tratábase de interaccionar, de abrir liñas de diálogo en liña, de solucionar dúbidas e dar respostas a estes rapaces e rapazas sobre temas como alimentación, saúde, enerxía, nanotecnoloxía, robótica, química, bioloxía, etc. Os propios estudantes foron os encargados de elixir ao científico ou científica favorita. [+info.](#)



O pazo da Cultura de Pontevedra acolle o XIV Congreso Internacional de Ciencias do Deporte e da Saúde..

A EDUCACIÓN FÍSICA CONTRIBÚE A UN MELLOR RENDEMENTO ESCOLAR

Duvi | Vigo

Eduardo Muñiz | Pontevedra

A reivindicación dun maior peso da educación física nos currículos escolares foi este xoves un dos temas de debate do XIV Congreso Internacional de Ciencias do Deporte e da Saúde, que ata este sábado reúne no Pazo da Cultura de Pontevedra a preto de 270 asistentes procedentes de oito países. 15 conferencias e talleres integran o programa dun evento promovido polo Concello, a Vicerreitoría do campus, o Departamento de Didácticas Específicas da Universidade da Coruña e Sportis Formación Deportiva, que na conferencia inaugural, a cargo do catedrático da Universidad de Castilla La Mancha, Onofre Contreras, puxo o foco na "relación directa" entre educación física e a "mellora do rendemento académico". [+info](#)



Juan Picos e Gonzalo Sancho.

A EE FORESTAL E O GREEN CAMPUS CONTRIBÚEN Á CONSERVACIÓN DOS MORCEGOS

Eduardo Muñiz | Pontevedra

Co propósito de colaborar co labor de preservación da biodiversidade que, na contorna do río dos Gafos, desenvolve a asociación Vaipolorío, a Escola de Enxeñaría Forestal acolleu este xoves o acto de entrega de seis caixas de madeira, dotadas dunha abertura na súa parte inferior co propósito de que sirvan como refuxio aos morcegos, deseñadas e elaboradas nos talleres desta escola no marco das actividades do proxecto Green Campus. O director da EE Forestal, Juan Picos, o responsable da Área de Planificación do campus, Celso Cancela, e o presidente de Vaipolorío, Gonzalo Sancho, participaron xunto ao técnico da EE Forestal Luis Torres e o alumno Emilio Iglesias, beneficiario da bolsa Green Campus [+info](#)

2



AS RUTAS CULTURAIS PECHARÁN A PROGRAMACIÓN DESTE CURSO CUNHA FIN DE SEMANA NA SERRA DO XURÉS

Duvi | Ourense


O pasado 21 de outubro arrancou na zona do Ribeiro a programación de rutas culturais deste curso académico organizada pola Área de Benestar, Saúde e Deporte da Universidade de Vigo. Esta fin de semana, 5 e 6 de maio, a programación pecharase cunha fin de semana no Parque Natural Baixa Limia Serra do Xurés. Coa "escusa" de coñecer este enclave natural, destaca José García-Calvo, Willy, coordinador dos roteiros universitarios desde o campus de Ourense, terán a oportunidade de convivir durante dous días persoas que comparten a mesma paixón por camiñar. [+Info](#)

FISIOTERAPIA PROMOVE UN CERTAME DE ARTE POSTAL CENTRADO NO MEDIO AMBIENTE

Eduardo Muñiz | Pontevedra

Xurdida no primeiro cuarto do século XX como un xeito de espallar a arte máis aló das fronteiras, a chamada arte postal, baseada na difusión de obras de pequeno formato a través do correo, constitúe a base de SaudArte dende o Green Campus, o certame de arte postal, aberto á participación de calquera persoa, que a Facultade de Fisioterapia vén de impulsar dentro das actividades do proxecto Green Campus. Ata o 17 de maio permanece aberto o prazo de recepción de obras de pequenas dimensións e temática ambiental coas que se dará forma á unha exposición na Biblioteca Central do Campus. [+Info](#)





As solicitudes poderán presentarse ata o . de maio.

A UNIVERSIDADE AMPLÍA A VÍTIMAS DE VIOLENCIA DE XÉNERO AS AXUDAS PARA ALUMNADO CON CIRCUNSTANCIAS ECONÓMICAS E FAMILIARES ESPECIAIS

M^a del Carmen Echevarría | Vigo

Co obxectivo, segundo a vicerreitora de Estudantes, Dolores González, “de cubrir as necesidades reais que non se estaban contemplando”, a Universidade de Vigo amplía en tres modalidades máis a convocatoria de axudas para o alumnado de grao e mestrado con circunstancias económicas ou familiares especiais que lles impidan ou dificulten a continuidade dos seus estudos no curso 2017/2018. Na quinta convocatoria das axudas, a institución académica viguesa decidiu sumar ás causas sobrevidas de todos os anos tres novas modalidades: vítimas de violencia de xénero afectadas polos cambios no decreto de prezos públicos [+Info](#)

3



15 alumnos e alumnas participaron nun obradoiro práctico sobre agricultura sostible.

NA UNIVERSIDADE TAMÉN SE APRENDE A XESTIONAR UNHA HORTA ECOLÓXICA

Duvi | Vigo

Entre vexetais, terra e plantas aromáticas, a carón do Centro de Investigacións Biomédicas (Cinbio), 15 alumnos e alumnas aprenderon nas últimas semanas a deseñar e xestionar unha horta ecolóxica nun obradoiro organizado pola Vicerreitoría de Extensión Universitaria e Relacións Internacionais para o segundo cuatrimestre. O labrego ecolóxico Jacobo Ojea é o encargado de impartir o taller, que comezou en febreiro e remata esta semana e no que participaron homes e mulleres de diferentes idades, dende os 20 ata os 60 anos. Con 30 horas de duración, o obxectivo era que os alumnos adquirisen os coñecementos necesarios para planificar un terreo de cultivo sustentable e mantelo durante un longo período de tempo. “Dou formación para que cadaquén poida levar a cabo unha hortiña e para que poidan ir solucionando os problemas que lle van xurdindo no día a día”, explica monitor do curso. [+Info](#)



O alumnado feminino de novo ingreso non superou este curso o 20% nos sete centros..

A UNIVERSIDADE MOBILIZA AS MULLERES TECNÓLOGAS PARA INCREMENTAR O NÚMERO DE ALUMNAS NAS TITULACIÓNS DE ENXEÑARÍA

M^a del Carmen Echevarría | Vigo

A brecha de xénero que existe nas carreiras técnicas e que non fai senón agrandarse nos últimos anos, afecta por igual a todas as titulacións do ámbito da enxeñaría que se imparten nos tres campus da Universidade de Vigo. Co obxectivo de reverter unhas cifras que sitúan a presenza de alumnado feminino de novo ingreso este curso nos sete centros nos que se imparten titulacións de enxeñaría nun 19,7% e unificar as accións que as escolas están a realizar illadamente para captar alumnas, a Universidade de Vigo pon en marcha IREI, Inspirando ás Rapazas para Estudar Enxeñaría. A iniciativa da Universidade de Vigo, segue os pasos de Inspira Steam, implantada hai dous anos na Universidad de Deusto, [+Info](#)



Este martes asináronse dous convenios de colaboración entre a Universidade e a Deputación.

244.500 EUROS PARA ACTIVIDADES CULTURAIS, INVESTIGACIÓN E MOBILIDADE NO CAMPUS DE OURENSE

Rosa Tedín | Ourense

A sinatura entre a Universidade de Vigo e a Deputación Provincial de Ourense do convenio de colaboración anual para o desenvolvemento de actividades de difusión cultural, dotado con 220.000 euros. A sinatura do convenio para a convocatoria o vindeiro curso académico dunha nova edición das bolsas de mobilidade Ourense Exterior, financiadas con 24.500 euros polas dúas institucións e polo Consello Social da Universidade de Vigo. A presentación da publicación *Memoria 2014-2018 Campus de Ourense-Campus da Auga*, na que se fai balance da execución deste proxecto de especialización. O campus de Ourense tivo este martes unha intensa axenda na que se puxeron en valor diferentes froitos da colaboración interinstitucional. [+Info](#)

4



As organizadoras co decano da facultade, Luís Alonso.

LENDO (E APRENDENDO) SEN ESTEREOTIPOS NIN DESIGUALDADES

D. Besadío | Vigo

Libros infantís, dirixidos a nenas e nenos de entre 3 e 10 anos, non estereotipados e non sexistas. Este é o eixe temático da exposición que estes días pode visitarse no vestíbulo central da Facultade de Filoloxía e Tradución, unha mostra aberta ao público en xeral organizada polo grupo de investigación Literatura infantil angloxermana e a súa tradución, integrado polas profesoras Veljka Ruzicka, como investigadora principal; Lourdes Lorenzo, Ana Pereira e Beatriz Rodríguez, e co apoio de Ana Fernández, secretaria técnica de Anilij, a Asociación Nacional de Investigación en Literatura Infantil y Juvenil. [+Info](#)

DOCE MULLERES INSPIRADORAS PARA AS E OS FUTUROS DOCENTS

Rosa Tedín | Ourense

Un libro que fala de "doce mulleres que conseguiron vencer as barreiras impostas ao seu xénero e dar os primeiros pasos por vieiros transitados ata ese momento só por homes". Deste xeito preséntase a publicación infantil *Pioneiras*, libro sobre o que este mércores falou a súa autora, Anair Rodríguez, na Facultade de Ciencias da Educación do campus de Ourense. A filóloga e coordinadora de edición de Xerais, foi ademais unha das convidadas a participar neste centro nunhas xornada de orientación destinadas ao alumnado dos graos de Infantil e Primaria. [+Info](#)



Ciencias da educación acolleu a presentación do libro de Anair Rodríguez "Pioneiras".



Brasa, González Penín, Fernández Villarino e Martín.

UNHAS XORNADAS REIVINDICAN UN ADESTRAMENTO DEPORTIVO QUE TEÑA EN CONTA AS CARACTERÍSTICAS DA MULLER

Eduardo Muñiz | Pontevedra

"No rendemento deportivo inflúen múltiples factores, entre os que destacan os biolóxicos e fisiolóxicos e, sen lugar a dúbida, calquera destes factores varían en función do sexo", sinala a profesora da Facultade de Ciencias da Educación e do Deporte Marián Fernández Villarino, directora dunha xornada que, na tarde deste mércores, buscaba por o foco nunha variable "determinante" á hora de desenvolver un proceso de adestramento deportivo. Unha variable respecto da que a día de hoxe seguen sendo "escasas as referencias técnicas e científicas", engade a coordinadora da xornada *Mulleres e rendemento deportivo*, que contou coa participación de José Manuel Brasa, adestrador da selección española feminina de hóckey herba que logrou o ouro nas Olimpíadas de Barcelona 92, e do profesor da UDC e responsable de atletismo feminino na federación española, Rafael Martín. [+Info.](#)



Alumnado do Centro de Linguas durante a realización dunha proba de nivel.

OS CURSOS INTENSIVOS DE VERÁN DO CENTRO DE LINGUAS ESTREAN BOLSAS

M^a del Carmen Echevarría | Vigo

O alumnado dos cursos intensivos de verán do Centro de Linguas poderá optar por primeira vez a bolsas cunha contía equivalente ao 75% do importe da matrícula dos estudos, que se impartirán os meses de xuño e xullo deste ano. Ata o 25 de maio poden presentarse as solicitudes a esta nova convocatoria que, segundo a vicerreitora de Estudantes en funcións, Dolores González, ten o obxectivo de "mellorar as competencias lingüísticas do alumnado que participe en programas impartidos total e parcialmente nunha lingua estranxeira, de xeito que a lingua vehicular non sexa un obstáculo para a adquisición do coñecemento, ou, en programas de mobilidade. [+Info](#)



A través dun posto propio na feira e de diversas conferencias.

O PROGRAMA UNIVERSITARIO DE MAIORES LEVA A GALISENIOR A SÚA OFERTA PARA UN ENVELLECIMENTO ACTIVO

Duvi | Ourense

Expourense acolle este mércores e xoves a celebración da novena edición de Galisenior. Este Salón Internacional das Persoas Maiores está considerado un referente no noroeste peninsular no seu eido de actuación e punto de encontro de atención ás persoas maiores, agardándose a asistencia de arredor de 5000 visitantes. Entre o medio centenar de expositores e actividades incluídos na programación, o Programa Universitario de Maiores da Universidade de Vigo ten o seu propio espazo, contando cun posto de información na feira e desenvolvendo varias conferencias. [+Info](#)



As e os investigadores de Cinbio encargados da organización do evento en Vigo..

UNHA PINTA DE CIENCIA PARA DESCUBRIR O TRABALLO DAS E DOS INVESTIGADORES

M^a del Carmen Echevarría | Vigo

A iniciativa de dous investigadores do Imperial College de Londres de abrir en 2012 as portas dos seus laboratorios a persoas afectadas por varias enfermidades para que coñecesen o seu traballo, sentou as bases do que no ano seguinte foi *Pint of Science*, o primeiro festival de divulgación científica, no que as e os científicos achegan as súas investigacións nun formato accesible ao público en bares de todo o mundo. Entre os días 14 ao 16 de maio a cidade de Vigo sumárase por primeira vez a esta iniciativa que contará coa participación das e dos investigadores e investigadores da Universidade África González, Diego Fernández, Carlos Ardao, Verónica Montes e Jaime Aneiros, ademais de Jorge Mira da USC, que falarán sobre o desenvolvemento dos sentidos, a óptica e a fibra óptica e os impostos. [+Info](#)



O festival internacional de divulgación científica desenvolverase os días 14, 15 e 16 de maio.

FÍSICOS E HISTORIADORES DO CAMPUS PARTICIPARÁN NA PRIMEIRA EDICIÓN EN OURENSE DE PINT OF SCIENCE

Duvi | Ourense

"Pint of Science 2018, o festival de divulgación científica internacional que propón un encontro entre investigadores e o público nos bares, chega os días 14, 15 e 16 de maio a 56 cidades de España, coa novidade de incluír a Ourense dentro deste universo singular. A cuarta edición segue batendo marcas: 308 eventos en 105 bares, coa participación de 730 científicos como relatores e case 400 voluntarios na organización". Deste xeito, preséntase por primeira vez en Ourense unha cita na que terán protagonismo destacado físicos e historiadores do campus. [+Info](#)



Alumnado do CPI José García de Mende achégase ao campús para coñecer a Sala Alterarte.

ALUMNADO DO CPI JOSÉ GARCÍA DE MENDE ACHÉGASE AO CAMPUS PARA COÑECER A SALA ALTERARTE

ROSA TEDÍN DUVI OURENSE 15/05/2018

Desde o pasado 16 de marzo e ata o 18 de maio, a Sala Alterarte do campus de Ourense acolle a intervención *Ser un lugar*, do artista lucense Jesús Otero-Yglesias e curada por Monse Cea. A mostra, que se enmarca na cuarta edición do proxecto expositivo desta sala *Estado Crítico. 12 Curador*s 12 Artistas*, foi visitada este martes por estudantes de cuarto curso de Educación Secundaria do CPI José García de Mende, que tiveron a oportunidade de ver como, a través de puntais e de poesía de Carlos Oroza, o creador racha o espazo e xoga co tempo para trasladar ás e aos visitantes a un lugar discursivo propio. [+Info](#)



780 participantes nas rutas culturais deste curso.

780 PARTICIPANTES NAS RUTAS CULTURAIS DESTE CURSO

ROSA TEDÍN DUVI OURENSE 15/05/2018

A programación de [rutas culturais](#) que este curso levou a cabo a Área de Benestar, Saúde e Deporte da Universidade de Vigo chegou ao seu fin e é momento de facer balance para a organización. José García-Calvo, Willy, coordinador destas andainas desde o campus de Ourense, sinala os bos resultados acadados, tanto en cifras, con 780 participantes nos doce roteiros celebrados e unha media de seis andainas por persoa, como na valoración do seu desenvolvemento tanto por parte da organización como das e dos participantes. [+Info](#)



Unha nova web á comunicación que sitúa as persoas usuarias no centro.

UNHA NOVA WEB ENFOCADA Á COMUNICACIÓN QUE SITÚA AS PERSOAS USUARIAS NO CENTRO

DUVI 15/05/2018

Tras unha década en funcionamento, o portal institucional da Universidade de Vigo dá paso desde hoxe a unha nova web “froito do traballo da comunidade universitaria e de persoas expertas, que non só implica un cambio tecnolóxico, senón un cambio de mentalidade”, explicou o reitor en funcións, Salustiano Mato, no acto de presentación da nova páxina, que este mediodía tivo lugar na sala de xuntas da Reitoría. Acompañado polo vicerreitor de Economía e Planificación, José Manuel García, e o xerente, Manuel Fernández Jáuregui, ambos os dous en funcións, e o director da Área de Tecnoloxías da Información e Comunicacions, ATIC, Juan Aguiar. [+Info](#)



En homenaxe a unha mestra amante da lingua galega.

EN HOMENAXE A UNHA MESTRA AMANTE DA LINGUA GALEGA

ROSA TEDÍN DUVI OURENSE 16/05/2018

Unha homenaxe a unha mestra escritora e amante da lingua galega feita por futuras e futuros mestres. Así se presentou este mércores o acto co que o campus de Ourense se sumou ás celebracións co gallo do Día das Letras Galegas 2018. Alumnado de Ciencias da Educación subiu ao escenario para representar ante un centenar de escolares dramatizacións de diferentes obras da literatura infantil e intentar transmitirllas a paixón pola lingua e a cultura galegas, ao igual que o fixo no seu tempo María Victoria Moreno a través das súas obras e maxisterio. [+Info](#)



A sétima Semana de Recollida de RAEE permitiu reunir 75 aparellos.

A SÉTIMA SEMANA DE RECOLLIDA DE RAEE PERMITIU REUNIR 75 APARELLOS

EDUARDO MUÑOZ DUVI PONTEVEDRA 16/05/2018

Máis dunha decena de ordenadores e monitores, seis impresoras, dous televisores, outras dúas aspiradoras..., e así ata un total de 75 electrodomésticos e dispositivos que serán trasladados a unha empresa autorizada na xestión deste tipo de residuos. Este é o balance que deixou a sétima edición da Semana de Recollida de RAEE (Residuos de Aparellos Eléctricos e Electrónicos), unha iniciativa impulsada ao abeiro do proxecto Green Campus que ten como obxectivo principal concienciar á comunidade universitaria da importancia do correcto tratamento do lixo no que rematan converténdose diferentes equipamentos que funcionan con electricidade ou con pilas e baterías. [+Info](#)



O campus Camp oferta 36 prazas en Ourense.

O CAMPUS CAMP OFERTA 36 PRAZAS EN OURENSE

DUVI OURENSE 18/05/2018

O día 22 de xuño comezan as vacacións para as e os escolares e agora é o momento para pais e nais de buscar alternativas para ocupar o tempo das e dos máis pequenos da casa. Para os membros da comunidade universitaria, a Universidade de Vigo organiza cada ano o [Campus Camp](#), un campamento que ofrece aos participantes diversión e aprendizaxe durante os meses de verán ao mesmo tempo que se achegan á institución na que traballan os seus proxenitores. [+Info](#)



Unha nova e sostible vida para a canteira de Richinol.

UNHA NOVA E SOSTIBLE VIDA PARA A CANTEIRA DE RICHINOL

M. DEL RÍO DUVI 18/05/2018

Elena Domínguez, Xoel González e Víctor Lago, estudantes da Universidade de Vigo, conforman o equipo gañador do I Premio de Restauración Sostible de Espazos Mineiros, un certame convocado pola Escola de Enxeñaría de Minas e Enerxía, que ten como finalidade darlle unha nova vida a unha canteira en desuso, neste caso á canteira de Richinol, preto de Melide. Esta semana o xurado do concurso, formado por técnicos da propia empresa ARE, propietaria da canteira, profesionais da restauración, docentes do campus e alumnos dos graos de Enxeñaría da Enerxía e Enxeñaría de Recursos Mineiros e Enerxéticos, deu a coñecer o seu veredicto [+Info](#)



Redes cidadáns para atopar respostas innovadoras á exclusión social.

REDES CIDADÁNS PARA ATOPAR RESPOSTAS INNOVADORAS Á EXCLUSIÓN SOCIAL

EDUARDO MUÑOZ DUVI PONTEVEDRA 21/05/2018

Implicar a múltiples axentes nunha reflexión conxunta sobre os diferentes factores que inciden na exclusión social e educativa co proposto de definir, desde unha perspectiva cidadá e comunitaria, solucións innovadoras para realidades concretas como o abandono e o fracaso escolar ou as repercusións da violencia machista na infancia. Esta é a base do proxecto *Redes de innovación para la inclusión educativa y social*, que o grupo de investigación Cies (Colaboración, Innovación e Investigación para a Equidade Socio-educativa), da Facultade de Ciencias da Educación e do Deporte, desenvolve conxuntamente con investigadores e investigadoras das universidades de Cantabria, País Vasco e Sevilla. [+Info](#)



Expertos lusófonos participan no campus nun seminario sobre investigación en xénero.

EXPERTOS LUSÓFONOS PARTICIPAN NO CAMPUS NUN SEMINARIO SOBRE INVESTIGACIÓN EN XÉNERO

D. BESADÍO DUVI 21/05/2018

Os investigadores Mário César Lugarinho e Emerson da Cruz Inácio, son dúas das figuras máis destacadas do ámbito académico lusófono e dos estudos poscoloniais especializados en teoría queer, estudos LGBTI, xénero e novas masculinidades e estudos africanos. Ambos manteñen unha fluída relación con investigadoras e investigadores da Universidade de Vigo e, froito desta relación, este luns visitaron a Facultade de Filoloxía e Tradución para participar no Seminario de formación de posgrao *Interseccionalidades: Xénero e Afrodescendencia*, unha actividade coorganizada por diferentes departamentos do centro e que xurdiu da vontade de dar a coñecer "a interseccionalidade que conforman as sociedades e as culturas. [+Info](#)



Nun conferencia o portavoz da súa fundación Lancy Dodem..

A MENSAXE CONTRA A POBREZA DE VICENTE FERRER FAISE OÍR NO CAMPUS

DUVI OURENSE 22/05/2018

A Facultade de Dereito do campus de Ourense acolleu este martes a conferencia *A Fundación Vicente Ferrer e a loita contra a pobreza na India*, ofrecida por Lancy Dodem, portavoz do Departamento de Comunicación desta fundación. A iniciativa é a primeira que organizan o Grupo de Investigación Medea Iuris da Universidade de Vigo e a Delegación de Alumnas e Alumnos da Facultade de Dereito no marco da colaboración asinada o pasado 25 de abril coa Fundación Vicente Ferrer e que ten como obxectivo recadar fondos para proxectos desta organización sen ánimo de lucro. [+Info](#)



O campus da Auga estreita lazos co Instituto Superior de Contabilidade e Administración do Porto.

O CAMPUS DA AUGA ESTREITA LAZOS CO INSTITUTO SUPERIOR DE CONTABILIDADE E ADMINISTRAÇÃO DO PORTO

DUVI OURENSE 22/05/2018

Fomentar a colaboración entre a Universidade de Vigo e o Instituto Superior de Contabilidade e Administración do Porto (ISCAP) do Instituto Politécnico do Porto no marco do Programa de Doutoramento Auga, Sustentabilidade e Desenvolvemento, que arrancou este curso académico no campus de Ourense. Con este obxectivo, Virxilio Rodríguez, vicerreitor en funcións do campus de Ourense, e Olímpio Castilho, presidente do ISCAP, veñen de asinar este luns na sede do centro luso un protocolo de colaboración entre as dúas institucións académicas. [+Info.](#)

10



A intervención con menores infractores, a debate en Ciencias da Educación.

A INTERVENCIÓN CON MENORES INFRACTORES, A DEBATE EN CIENCIAS DA EDUCACIÓN

DUVI OURENSE 23/05/2018

A Faculta de Ciencias da Educación do campus de Ourense acolleu este mércores a celebración da I Xornada de Intervención Profesional con Menores, cita organizada pola Asociación Centro Trama coa colaboración do centro. A sesión celebrada nas instalacións universitarias estiveron centradas na intervención con menores infractores en medio aberto. Durante a cita, abordouse o traballo con este colectivo tanto desde o punto de vista da administración como das entidades que traballan na execución das medidas xudiciais en medio aberto. Ademais, a xornada contou coa intervención do psicólogo, educador e xornalista Jaume Funes, que falou das regras educativas para que as e os menores se convertan en profesionais útiles. [+Info](#)



A entrega dos Premios Sofía Novoa pon en valor a investigación en prol da igualdade.

A ENTREGA DOS PREMIOS SOFÍA NOVOA PON EN VALOR A INVESTIGACIÓN A PROL DA IGUALDADE

DUVI PONTEVEDRA 23/05/2018

Premiar a inclusión da perspectiva de xénero nos traballos de fin de grao e fin de mestrado realizados polo alumnado da Universidade de Vigo é o propósito central dos Premios Sofía Novoa Ortiz, impulsados pola Deputación de Pontevedra e que na súa segunda edición recoñeceron os traballos das egresadas Lucía Troncoso, Eva Fontáns e Raquel Armán, centrados na importancia da inclusión da perspectiva de xénero na educación infantil e na promoción dunha linguaxe inclusiva. [+Info.](#)



A ÁREA DE EMPREGO CONVIDA AO ALUMNADO A FACER PRÁCTICAS AO 'OUTRO LADO DA RAIA'

D. BESADÍO DUVI 23/05/2018

"A idea é que aprendan que hoxe en día o mercado laboral é totalmente aberto, abrirlle os ollos ao concepto transfronteirizo da súa carreira profesional". Así explica o director da [Área de Emprego](#) da Universidade de Vigo, Alejandro Martínez, a principal finalidade coa que se puxo en marcha, hai xa un par de anos, un programa de [bolsas de formación complementaria para a realización de prácticas académicas externas](#) extracurriculares con carácter transfronteirizo. Agora acaba de publicarse a terceira convocatoria, unha edición na que se incrementa o número de empresas participantes e o abano de titulacións de grao cuxas alumnas e alumnos poden optar a estas axudas. [+Info.](#)

11



Foto de familia dos e das participantes nesta xuntanza de traballo.

A UNIVERSIDADE SUMA NOVOS PARCEIROS NA SÚA ALIANZA COA REDE BRASILEIRA DE INSTITUTOS FEDERAIS

D. BESADÍO DUVI 24/05/2018

Vigo foi, hai apenas uns meses, a primeira universidade europea en asinar un acordo de colaboración con Conif, a principal rede educativa, científica e tecnolóxica de institutos federais do Brasil e na que estudan arredor dun millón de alumnas e alumnos procedentes de todo o país. A relación iniciárase xa no ano 2014 e, dende entón, as xuntanzas de traballo a un e outro lado do Atlántico foron frecuentes. O último destes encontros tivo lugar este mesmo xoves na antiga reitoría da rúa Oporto. [+Info.](#)

O PROXECTO FIRERS PROXÉCTASE CARA EUROPA

M. DEL RÍO DUVI 25/05/2018



Os viaxeiros do Road Trip Project con Fernando Aguado, IP do proxecto..

O [Road Trip Project](#) é unha iniciativa da Unión Europea na que varios mozos e mozas percorren o continente durante a primavera e o verán coñecendo e divulgando diferentes iniciativas e proxectos financiados pola comisión. O obxectivo é que a xente nova experimente por si mesma en que consiste e que vantaxe representa a Unión Europea para a cidadanía. Para iso catro parellas percorren nestes meses catro rutas por diferentes partes do continente e unha delas, a Ruta Atlántica, recalou este venres no campus de Vigo para coñecer o [proxecto FireRs](#), que foi unhas das iniciativas seleccionadas para protagonizar o programa viaxeiro na súa versión atlántica. Yldau, de Amsterdam e Fabián, ecuatoriano residente en Vilnius, son os dous viaxeiros que fan de fío condutor desta ruta. [+Info.](#)



A profesora de Ciencias da Educación e do Deporte Ana Rey.

RECOÑECIMENTO A UN RECURSO DIDÁCTICO CONTRA OS ESTEREOTIPOS DE XÉNERO NAS IMAXES

EDUARDO MUÑOZ DUVI PONTEVEDRA 30/05/2018

Promover unha reflexión respecto dos estereotipos de xénero representados nas imaxes, neste caso vinculadas ao deporte e á actividade física, é o propósito de *O xénero nos ollos*, un recurso didáctico que a profesora da Facultade de Ciencias da Educación e do Deporte Ana Rey e a investigadora Alba González, actualmente docente na Universidad Pontificia de Salamanca, desenvolveron ao abeiro do Premio Antonia Ferrín Moreiras, que promove a Unidade de Igualdade da Universidade de Vigo. Dispoñible desde hai un ano na rede para o seu uso didáctico, este proxecto vén de ser recoñecido nos Premios Deporte Feminino Galego 2017, que promove a asociación Mulleres Deportistas Galegas (Mudegá). [+Info.](#)

UNIVERSIDADE DE VIGO

Unidade de Análisis e Programas.

Anexo a xerencia.

Planta Baixa.

36310 Vigo (Pontevedra)

986.818.689 986.818.640